

**BOSNA I HERCEGOVINA
FEDERACIJA BOSNE I HERCEGOVINE
VLADA**

Prijedlog

ODLUKA

**O ALOKACIJI OBAVEZA PO KREDITU EVROPSKE INVESTICIJSKE BANKE
20515-PROJEKT ZA PUTEVE BOSNE I HERCEGOVINE (SARAJEVSKA
OBILAZNICA) NA FEDERACIJU BOSNE I HERCEGOVINE**

Sarajevo, april 2014. godine

Na osnovu člana 40. stav 5. i člana 37. stav 3. Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, br. 86/07, 24/09 i 44/10), Predstavnički dom Parlamenta Federacije Bosne i Hercegovine na _____ sjednici održanoj _____ godine i Dom naroda Parlamenta Federacije Bosne i Hercegovine na _____ sjednici održanoj _____ godine, d o n o s i

O D L U K U

o alokaciji obaveza po kreditu Evropske investicijske banke 20515-Projekt za puteve Bosne i Hercegovine (Sarajevska obilaznica) na Federaciju Bosne i Hercegovine

I

Kredit Evropske investicijske banke (u daljem tekstu: EIB) broj 20515 - Projekt za puteve Bosne i Hercegovine (Sarajevska obilaznica) u iznosu od 40 miliona EUR-a, u cijelosti se alocira na Federaciju Bosne i Hercegovine.

II

Za realizaciju ove Odluke zadužuju se Federalno ministarstvo finansija-Federalno ministarstvo financija, Federalno ministarstvo prometa i komunikacija i JP Ceste FBiH, svako u okviru svojih nadležnosti.

III

Ova Odluka stupa na snagu narednog dana od dana objavljivanja u „Službenim novinama Federacije BiH“.

OBRAZLOŽENJE

Pravni osnov

Pravni osnov za donošenje ove Odluke sadržan je u članu 40. stav 4. i 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br: 86/07, 24/09 i 44/10), koji propisuje pitanja vanjskog zaduženja Federacije i procedure za zajmove, kao i da Vlada Federacije Bosne i Hercegovine nakon prihvatanja nacrtu kreditnog sporazuma i utvrđivanja Prijedloga odluke, istu dostavlja Parlamentu Federacije BiH na usvajanje. Također, članom 37. stav 3. ovog Zakona propisano je da je zaduženje javnih preduzeća na osnovu vanjskog duga, zajedno sa pratećom dokumentacijom, predmet prethodne saglasnosti Parlamenta Federacije Bosne i Hercegovine.

Iako je Ured za zakonodavstvo i usklađenost sa propisima Evropske unije dao mišljenje s rezervom u smislu ovlaštenja Parlamenta Federacije BiH da odlučuje po pitanju alokacije obaveza koji se donose ovom Odlukom, s obzirom da se zakonske odredbe na koje se poziva u uvodnom dijelu prijedloga Odluke odnose samo na slučajeve novog zaduživanja Federacije BiH, mišljenja smo da je za donošenje ove Odluke potrebno ispoštovati procedure navedene u članovima 37. i 40. Zakona, smatrajući da su ovlasti Parlamenta Federacije BiH najmjerodavnije za odlučivanje po pitanjima vanjskog zaduživanja, u što spadaju i izmjene postojećih sporazuma.

Razlozi za donošenje

S obzirom da su u toku implementacije Projekta, Zakonom o cestama u Federaciji Bosne i Hercegovine izvršene promjene u organizaciji sistema upravljanja i održavanja cestovne infrastrukture u FBiH, odnosno istim je Federacija BiH osnovala JP Autoceste FBiH u čijoj je nadležnosti upravljanje, građenje, rekonstrukcija, održavanje i zaštita autocesta i brzih cesta u Federaciji BiH, te s obzirom da je Sarajevska obilaznica dio Koridora Vc, nakon čije izgradnje će istom upravljati JP Autoceste FBiH, a ne JP Ceste FBiH u čijoj su nadležnosti upravljanje, građenje, rekonstrukcija, održavanje i zaštita magistralnih cesta.

Imajući u vidu obaveze JP Autoceste FBiH za servisiranje postojećih kredita za izgradnju autoputa na Koridoru Vc, odnosno da bi pored postojećih ugovorenih kredita (EBRD, EIB i Kuvajtski fond), alociranje postojećih kreditnih obaveza za Sarajevsku obilaznicu umanjilo kreditnu sposobnost i mogućnost JP Autoceste FBiH za ugovaranje planiranih kreditnih aranžmana, predloženom Odlukom se kredit EIB 20515 u cijelom iznosu alocira na Federaciju BiH.

Implementator Projekta iz tačke I ove Odluke koji se finansira iz kredita EIB koji je predmet prijenosa iz ove Odluke, je Javno Preduzeće Ceste Federacije Bosne i Hercegovine (u daljem tekstu: JP Ceste FBiH), koje će po okončanju radova izgrađeni dio Sarajevske obilaznice predati u nadležnost i upravljanje Javnom preduzeću Autoceste Federacije Bosne i Hercegovine.

Obrazloženje pojedinih tačaka

Tačkom I definira se alokacija kredita EIB-a na Federaciju BiH.

Tačka II definira da se za realizaciju ove Odluke zadužuje Federalno ministarstvo finansija - Federalno ministarstvo financija, Federalno ministarstvo prometa i komunikacija i JP Ceste FBiH, svako u okviru svoje nadležnosti.

Tačka III propisuje stupanje na snagu ove Odluke.